

Oqaasiliortut peqatigalugit inatsilerinermi kalaallisut oqaatsinik ineriartortitsinermik akuersinissamillu suliaqarnermik Naalakkersuisut salliutsitsinissaat pillugu Inatsisartuni aalajangiiffigisassatut siunnersuut. Taamattaaq Naalakkersuisut Oqaasiliortunik oqaloqateqarnermik kingorna UPA2019 sioqqullugu sulinissamut piffissamut pilersaarummik saqqummiussinissaannik peqquneqarput.
(Siumup inatsisartunut ilaasortaataitai)

Oqaasiliortut peqatigalugit inatsilerinermi kalaallisut oqaatsinik ineriartortitsinermik akuersinissamillu suliaqarnermik Naalakkersuisut salliutsitsinissaat pillugu Inatsisartuni aalajangiiffigisassatut siunnersuut. Taamattaaq Naalakkersuisut Oqaasiliortunik oqaloqateqarnermik kingorna UPA2019 sioqqullugu sulinissamut piffissamut pilersaarummik saqqummiussinissaannik peqquneqarput.
(Inuit Ataqtigiit Inatsisartuni ilaasortaataitai)

Akissuteqaat

(Ilinniartitaanermut, Kultureqarnermut, Ilageeqarnermut Nunanullu Allanut Naalakkersuisoq)

Aappassaaneerneqarnera

Kultureqarnermut, Ilinniartitaanermut Ilisimatusarnermut Ilageeqarnermullu Ataatsimiititaliamit isumaliutissiisummut Naalakkersuisut sinnerlugit qujavunga.

Siunnersuutip siullermeerneqarnerani Google-translate kalaallisut suliarineqarnerani Naalakkersuisut suliaasa killiffiat apeqqutigineqarpoq, ataatsimiititaliallu matuma siunnersuutip aappassaaneerneqarneranut atatillugu suliaq sumut killinnersoq nalunaarutigeqqullugu Naalakkersuisut qinnuigai.

Taassunga atatillugu erseqqissarneqassaaq Naalakkersuisut google-translate-mik suliaqanngimmata maskiinamilli nutserummik suliaqartoqarmat, maskiinamik nutserummik suliaq maanna pilersaarutigineqarpoq 2021-mi naammassisussatut.

Maskiinamik nutserisummik suliap killiffia aallaqqaataanit pilersaarutaasimasoq malillugu annikitsumik kinguaattuulaaqqavoq. Suliap agguataarnerinit sisamaasunit agguataarnera siulleq, kalaallisuumit danskisuumut nutserineruvoq. Aallaqqaataanit pilersaarutaasimagaluarpoq suliap agguartaarnerata aappaa juni 2018-imi aallartinneqassasoq, tamannali aatsaat aallartinneqarpoq septembari 2018-imi oqaatsinit katersuivik misiliutissaq suli naammassineqanngimmat, danskisuumit kalaallisuumut nutserinermut maleruagassat suliarineqarfissaat.

Suliap asseqanngitsuunera naatsorsuutigineqareersutut unammillernartoqarpoq, kalaallit oqaasiini polysyntetiskiusunit atortorissaarutit avataaninngaanniit eqqussat misilittarneri

iluatsittarsimangillat. Suliaq misilittagaqarfigineqanngitsumi immikkuullarilluni ingerlavoq oqaatsit polysyntetiskiusut oqaatsillu analytiskiusut ataqatigiissinniarnertut suliaqarfiummat.

Unamminartoq alla naatsorsuutigineqartumit annerusimasoq piukkunnaatilinnik naammattunik sulisussaqaarniarnermut tunngasimavoq. Suliaq taamatut ittoq piginnaasanik tunniusimanermillu piumasaqaatinik annertuunik peqarpoq.

Suliaq marloqiusanngorlugu suliarineqarpoq, siulleq nutserinermut ordbogi oqaaseqatigiilerinermik oqaatsinillu isumasiuinertalimmik suliarineqarpoq, nutserinermut oqilisaataasussatut ordbogimut ilanngussuilluni, aappaattullu oqaatsinik katersuivik Katersat inaarsarneqarpoq oqaatsinik tunngaviusunik oqaaseqatigiinnillu.

Naatsumik oqaatigalugu unammilligassat eqqaaneqartut pequtigalugit annikitsumik suliaq kinguaattooqqalaarpoq arlerinartumilli kinguaattooqqanani.

Naalackersuisut maluginiarpaat Ataatsimiititaliap isumaliutissiisummi immikkoortoq 2.2 AI2018 allaaserigaat AIS2019-imut qaffaatissatut siunnersuut. Tassunga tunngatillugu erseqqissaataassaaq Oqaasileriffimmut aningaasaliissutit AI2018-imi qaffanneqarnikummata imatut oqaasertalerlugit:

Issuaaneq:

“Konto pingaarneq manna 2018-imiit oqaatsinik sullissinermik suliaqarnermut ukioq ataaseq sulinissamut aamma Oqaasileriffiup sulinerata ataatsimut nukittorsaaffiginissaanut ukioq ataaseq sulinissamut ukiumut 1,0 mio. kr.-inik ilaniarneqarpoq.”

Naalackersuisut Ataatsimiititaliap kaammattuutai oqaaseqaataalu tusaatissatut tigullugit Naalackersuisut siunnersuutit akuersissutigiginissaannik inassuteqarput.